

Kapiya Sën Pita Kevu Netu Luu Vu Kerisi-yi-alam

¹ Yesu Kerisi yi hur los yi sinarë sa Simon Pita. Sa nekevu kapiya sënë yök vu ham sën ham ayomin neya timu vu yi nebë he behil nehevong ving ggëp ti lo. Yesu Kerisi tu hil Anutu, getu hil mehö sën neko hil yom vu yi lo. Yi mehö yohvu om sën vong behil ayod neya timu vu yi.

² Gwëbeng ham rak Anutu luho hil Mehöböp Yesu nij venuh, om luho degevong semusemu nyëmasën nök böpata jak vu ham, gedevong beham ayomin gëp revuh rot.

Anutu Ggoin Hil Rak Tu Yö Yi Ngaa

³ Hil arak Anutu ni in ggoin hil rak in bë hil gaço niwëek los vunek vunek yagek-yi natu hil ngaa behil sepa dok yi aggata nivesa. Lob vong ngaa pin sën hil narak vu in lo vu hil in yi mehö niwëek degwa, om sën hil ayoh vu bë medo nivesa besepa dok aggata niröp mu.

⁴ Yönon, ngaa pin sën nedo dob agi og rëk petar na bemala nama na, in mehönon malaj nesepa ngaa nipaya paya mu. Gaç hamek su rëk malamin nama na verök yi nabë saga rë. In Anutu rëk geço ham vër gegevong yi semusemu böp los nivesa anon sagi vu ham in ham natu yi alam benimin nabë yi.

⁵ Ham kwamin bo ngaa saga beham gwevong huk niwëek rot geving. Ham ayomin neya timu vu Yesu om ham gwegin ham begwevong ngaa

nivesa vesa geving. Ham gwevong ngaa nivesa, log ham gwevong huk in gagek pin in ham natok jak degwa mejak ni geving.

⁶ Ham natok jak kwamin mejak gagek degwa ni nabë saga, log ham gwegin ayomin nivesa geving. Ham gwegin ayomin nivesa, log ham najom ham ahon bebare niwëek geving. Ham najom ham ahon mebare niwëek, log ham sepa dok Anutu yi aggata niröp geving.

⁷ Ham sepa dok Anutu yi aggata niröp, log ham gwelë Kerisi-yi-alam nivesa geving. Ham gwelë Kerisi-yi-alam nivesa, log ham ahëmin geving mehönnon pin geving.

⁸ In nabë ham sepa dok ngaa pin sënë begwevong pangsen, og ham su rëk medo meris geham huk anon nama rë. Gak ngaa sënë rëk gevong beham jak hil Mehöböp Yesu Kerisi yi ngaa pin ni los dahis.

⁹ Gak mehö sën su hen huk nebë agi neggëp rë lo, og yi nebë mehö mala kenod. Genebë mehö mala raru sën su yoh vu bë gelë ngaa gëp adingnë rë lo. In ggërin demi yom vu gagek sën Anutu ripek yi ngaa nipaya wirek hen ya lo.

¹⁰ Om arig lo, Anutu ggooin ham rak ggovek betato ham bë ham natu yi alam, om ham ngo pasang gwevong huk niwëek in anon jak vu ham. Nabë ham sepa dok ngaa pin sënë, og ham su yoh vu bë rëk bës rë.

¹¹ Yönon, nabë ham gwevong nabë sënë, og rëk tatekin aggata vu ham, beham dok na hil Mehöböp Yesu Kerisi sën neko hil vër in hil ngaa nipaya nyëvewen lo yi nyëg. Sën rëk gëp degwata los degwata lo.

12 Sënək yönon, ham raḵ ngaa pin sënë ni vorot. Lob ham ḵo gägek anon sënë raḵ ggovek ya, lob ham nare niwëek in. Rëḵ sa bë nanër vu ham gök gökin, in sebër ham kwamin beham kwamin bo gökin.

13 In sa kwag nevo bë ngaa sënək nivesa, om noh vu buk sën sëḵ nahën nemedo vesag lo, og sëḵ nanër vu ham gök gökin in sebër ham kwamin.

14 In hil Mehöböp Yesu Kerisi nër rangah vu sa wirek beseraḵ ni bë yiḵ sa hevongin getur sa vër in navig nyë dus teka.

15 Om sën sa nehevong huk niwëek rot meneḵevu gägek yök vu ham, in bë nabë sa nadiiḵ, og ham yoh vu bë rëḵ kwamin bo gägek sënë gökin noh vu buk pin.

He Halë Kerisi Nikapiik Ggovek Ya

16 Gägek sën he nanër agi og he su nanër keriiing tetuhinsën nebë sën mehönon los kwaj yö kwaj nevo medenenër lo rë. Gaḵ he halë raḵ malamin bë Mehöböp los bengö yönon. Om sën he nër vu ham ggovek ya beham raḵ hil Mehöböp Yesu Kerisi niwëek ni, geham raḵ ni bë rëḵ nom gökin.

17 Yönon, Ama Anutu tato niwëek los arë böp rangah loḵ buk sën gägek yam vu nikapiik degwa beḵo yi raḵ lo bë, “Sa nalug sënë, sahëg ving yi pangsën gesa ahëg nivesa rot vu yi.”

18 Alöö nado ving yi ggëp ḵedu vabuung wirek behango aye sënë yam vu yaḵek.

19 Nebë saga, lob he halë bë alam-denenër-gägek-rangahsën hir gägek anon raḵ. Om bë ham najom hir gägek ahon, og saga mëm nivesa rot. In alam-denenër-gägek-rangahsën hir gägek og nebë

ram sën netum lok nyëg malakenu, benedo rot benyëg neheng rak lob Betuheng Majelëë kedi netum lok ham ayomin lo.

²⁰⁻²¹ Rëk mu ham jak sënë ni namugin rë nabë wirek og Anutu yi gägek su verup mehöti avi yoh vu yö kwa rë. Gaç Anon Vabuung yö neggee vu sir bedenenër Anutu yi gägek yam rangah. Nebë sënë om hil su ayoh vu bë tatekin gägek sën neggëp lok Anutu-yi-kaþiya lo ti degwa jeggim jeggim noh vu hil ngo kwad rë, gaç Anon Vabuung dok vu hil og mëm.

2

Alam-gägek-kuungsën Hir Ngaa Nipaya

¹ Wirek og alam-gägek-kuungsën deverup lok alam Israel, om yik tatovaha-gägek-kuungsën-yi rëk deberup dok ham geving nabë saga. Rëk debun sir gedenanër gägek kuungsën aggagga in debasap alam, geyö rëk degeruu demij vu Mehöböp sën bago sir yom lo geving. Rëk degevonng nabë sënë, rëk mu rëk malaj nama pevis avuti.

² Nebë saga rëk mu alam ngahisekë rëk de-sepa dok alam saga hir ngaa nipaya aggagga, lob tum rëk degevonng balam jeggim jeggim la denanër gägek nipaya jak aggata-gägek-anon-yi.

³ Alam sagi malaj anöo verök yi, om rëk denanër gägek kuungsën ngahisekë in degeko ham hömin monë lu ngaa nah vu sir. Rëk mu Anutu yö ro buk sën gengo hir gägek lo wirek meneggëp vorot bë rëk malaj nama. Lob ngaa sën basap sir lo, og su ggëp yiing rë, gaç yö medo negin.

⁴ Log yik angër la devonng ngaa nipaya wirek, rëk Anutu su nelë sir mu rë. Gaç duu sir

loḵ ya ḵarabus ggëp Nyëg Nipaya loḵ waḵ malakenu. Lob nahën denedo loḵ rot medenegin buk-nyëvewen-yi.

⁵ Log yik alam sën denedo wirek lo, og yik nebë saga ving. Su kwa pesivin sir rë. gaḵ vong mebël vuuk böpata merehöö sir vahi sën deruu demij vu Anutu lo bemalaj maya. Gaḵ yik Noa timu sën nenër gägek yohvu yam rangah lo, om Anutu gin yi, gegin yi alam nemadvahi-bevidek-luu medenedo nivesa ving.

⁶ Log vo nyëvewen vu alam Sodom los Gomora ving nebë saga. Anutu vesi beggang bu böp luu sënë rak nengwah megga sir bemalaj maya verök yi. Gevewev meris mu nedo. Nebë saga in bë nabë alam degeruu demij vu Anutu, og kwaj bo nah gägek wirek hen sagi, lob deḵ ni nabë rëḵ denatök vu nyëvewen nabë sënë.

⁷ Gaḵ Lot og yi mehö yohvu, om Anutu ḵo yi vër in Sodom los Gomora, benedo nivesa gesu mala ma rë. In Lot ayo maggin böpata in alam nij paya hir baggëb lu ngaa sën denevong lo.

⁸ Yönon, mehö niröp sënë nedo ving sir beyö nelë hir ngaa nipaya los nengo hir gägek nipaya yoh vu buk pin. Yi og ayo yö neggëp niröp, om ayo maggin rot in hir ngaa nipaya sën denevong medenekeyëh horek lo.

⁹ Yönon, Mehöböp neko alam sën denesepa loḵ yi lo vër in ngaa nipaya sën neseggi sir lo, genetung alam nij paya medenedo rot in na berup doḵ buk sën gengo hir gägek gebo nyëvewen doḵ nah vu sir lo.

¹⁰ Lob alam-gägek-kuungsën lo saga vahi rëḵ degeḵo nipaya nyëvewen böpata rot kesuu. Sir sën

ahěj neving ngaa-ningöhek-baggëb-yi mu medenesepa loḵ, gekwaj nevo Mehöböp aye bë ngaa meris lo. Alam nebë sënë deneko sir rak bedenesepe loḵ yö kwaj mu. Om sën su deneggöneng rë, gedenenër pelë rak angër yaḡek yi.

¹¹ Angër lo dekesuu alam gaḡek kuungsën sënë, genij wëek böpata rot kesuu sir ving. Rëḵ mu su denenër pelë rak sir rë, gesu denenër sir rangah vu Mehöböp rë.

¹² Gaḵ alam gaḡek kuungsën sënë, og denenër pelë rak ngaa sën su derak ni rë lo. Sir nebë reggu sën kwaj masën lo, om sën kwaj neya vu navij medenesepa loḵ ngaa-navij-yi mu. In ataj ko sir in bë mehönön denajom sir ahon bedengis sir medenadiik. Om yik ngaa nipaya sën denesepe loḵ lo rëḵ gevong bemalaj nama na verök yi.

¹³ Rëḵ degeko nyëvewen nipaya dok nah hir ngaa nipaya. In su ahěj neving rot bë dega nos böp los denanum bël niwëek pangsen buk mu rë, gaḵ denevong rangah atov ving. Log denelok ya ving ham beham los newa nos-ahëvingsën-yi loḵ ti. Rëḵ mu denetetuhin ham gekwaj vesa in ngaa nipaya sën denevong vu ham agi, om sir nebë ngaa ningöhek gengaa nipaya loḵ len.

¹⁴ Malaj anon medenelë avëh yoh vu buk in bë degodeḵ sir. Lob malaj su yoh vu bë rëḵ gevuu ngaa nipaya rë, gaḵ ma verök yi. Alam sënë dene-pelëpin alam sën su ayoj niwëek rë lo, bedenedadii sir ya in bë degevong ngaa nipaya geving sir. Ayoj yö tahu sir loḵ aggata sën ayoj nevu nevu in mehön gwë hir ngaa lo, om Anutu rëḵ kevoh alam sënë na verök yi.

¹⁵ Alam-gaḡek-kuungsën lo sënë deruu demij vu

aggata nivesa, om sën deneketul loḵ medeneya jeggin jeggin, beya denesepa loḵ Beyor nalu Balaam sën ahë neving monë pangsën rot beneko rak terotsën lo vaha.

¹⁶ Dogi su denevengwëng rë, rëḵ mehö-nenër-gagek-rangahsën Balaam yi dogi vengwëng nebë mehönon benër Balaam yi ngaa nipaya sën neving agi rangah. Lob ggërin ngaa kwamasën sën bë gevong lo.

¹⁷ Log alam-gagek-kuungsën nebë sënë, og sir nebë bël veyë sën netewii ya lo. Gesir nebë beggob sën sang neko meneya jeggin jeggin lo. Om Anutu ggooin nyëg mala vahis veröḵ yi rak vu sir in bë demedo dok.

¹⁸ Sir sënë denevengwëng avij böp medeneko sir rak in gagek meris meris sën anon ma lo. Lob denevo bël loḵ alam sën nahën denevuu ngaa-alam dahis-yi ya lo, lob tum newaj nerak in baggëb los navij yi ngaa nipaya aggagga beyah denesepa loḵ sir.

¹⁹ Alam gagek kuungsën sënë denenër vu sir bë rëḵ degeko sir vër in horek pin besu deginengin sir rë. Rëḵ mu sir yö nahën denedo los ngaa nipaya sën neduu sir lo. In degwa nebë sënë bë ngaa sën kesuu mehöti lo, og mehö saga neggurek babu benesepa loḵ rot.

²⁰ Yönon, derak hil Mehöböp Yesu Kerisi sën ko hil yom lo ni, lob deveya in ngaa ningöhek nipaya sën neggëp dob agi bedeyom. Rëḵ mu nabë degërin sir nah bedega jak ngaa nipaya sënë gökin menaduu sir ahon, og rëḵ demedo paya na veröḵ yi kesuu muginsën.

²¹ In derak aggata sagi ni bedeko horek vabuung

sënë ggovek ya, loḵ yom deruu demij vu. Gaḵ bē yō demedo duḡ in ngāa niröp sënë yi aggata, og saḡaḵ nivesa vu sir.

²² In devong balam hib wirek hir ḡaḡek los kwa ti sënë anon raḵ raḵ sir nebē, “Anöö yah negga nyē muteksën ggökin.” Log ḡaḡek ngwē neggēp ving bē, “Bööḵ ripek loḵ bēl ggovek, loḵ tum yah sis madöp ggökin.”

3

Mehöböp Rēḵ Nom Yönon Rot

¹ Sa mehö lo-e! Sa ḡevu ḡapiya ngwē sënë netu luu vu ham. Loḵ ḡapiya luu sënë og sa ḡevu ḡaḡek in bē bēḡ ham kwamin in ḡaḡek vahi gökin beham jaḵ ni nivesa.

² Log ham kwamin bo nah ḡaḡek sën Anutu-yi-alam-vabuung denenēr rangah wirek bē rēḵ anon jaḵ lo. Geham kwamin bo Mehöböp sën ḡo hil yom lo yi horek sën ham sinarē lo denēr vu ham lo geving.

³ Ham jaḵ sënë ni namugin nabē Buk-tamusën dus jaḵ, og alam sën denenēr pelēsën lo rēḵ deberup bedegevong noh vu kwaj nipaya medenanēr pelē nabē,

⁴ “Nēr bē rēḵ nom gökin-a? Lob maḵ yom benedo tena? Su yom rē! Alam hib wirek dediik ya, geyam beyam verup gwēbeng sënë, rēḵ mu ngāa pin yō neggēp loḵ ben nebē sën wirek Anutu tung lo.”

⁵ Alam pelēsën sënë nij nelēl bē su kwaj sero medejaḵ ngāa sënë ni nabē: Vu muginsën og Anutu nēr, lob yaḡek anon raḵ. Log nēr, lob dob ggooin yi raḵ in loo benedo loḵ loo vuheng atov.

⁶ Lob dob nedo rot, loḵ mēm Anutu nēr, lom mēm bël vuḵ meggërin dob bekevoh ngaa pin ya.

⁷ Lob Anutu nēr ving bë yagek los dob sën denedo gwëbeng agi, og nengwah rëḵ ga. Rëḵ mu gëp degegin buk sën Anutu nom mebo nyëvewen doḵ nah vu alam sën deneruu demij vu yi lo be-malaj nama rë.

⁸ Rëḵ mu sa mehö lo-e, ham su kwamin birek in ngaa timu sënë: Mehöböp su nelë buk timu nebë dus gengebek 1,000 nebë ading rot rë, gaḵ nelë luho bë luho neggëp ti.

⁹ Mehöböp su nesis buk raḵ raḵ in ngaa sën nenër menevenuh ya vorot lo nebë mehönon vahi sën kwaj nevo bë denanër gagek medengis jaḵ jaḵ lo rë. Gaḵ ahë neving bë alam pin degërin sir in mehöti su mala nama, om sën nahën nejom yi ahon genëgin ham.

Dob Los Yagek Sënë Rëḵ Malaj Nama Na

¹⁰ Rëḵ mu buk sën Mehöböp nom lo, og rëḵ nam nabë sën alam hodeḵ deneyam. Doḵ buk sagi, og yagek rëḵ tetap böpata log mala nama na. Log ngaa mahen mahen pin sën nedo loḵ lo, og rëḵ niḵerus jaḵ bedëtek, log nengwah ga megovek na. Log nengwah rëḵ ga dob los ngaa pin sën mehönon desemu menedo loḵ lo geving.

¹¹ Ngaa pin sënë rëḵ nama na nabë sënë. Om ham pasang gwëvong ngaa niröp mu, begwëgin ham gesepa doḵ Anutu yi aggata noh vu buk pin.

¹² Geham medo gwëgin Anutu yi buk sën yagek rëḵ natum doḵ benama na, log ngaa mahen mahen pin niḵerus jaḵ bedëtek benengwah ga be-

govek na lo. Lob ham gwetung malamin geham bo kwamin in buk sënë in lob natok nam pevis.

¹³ In hil nehegin yagek los dob mewis sën Anutu nër bē rēk getung bengaa niröp mu yō gēp dok lo.

Hil Malad Sepa Megegin Mehöböp

¹⁴ Sa mehö lo-e, yik ham negin ngaa sënë, om ham nimin wëek begwegin ham nivesa in vu tamusën og ngaa nipaya ti, ma gagek ti, su gēp vu ham. Gaḅ ham los Anutu medo los gagek ahē yes.

¹⁵ Rēk ham kwamin bo sën Mehöböp nejom yi ahon benahubin hil lo nabē: Sënë tatekin aggata in bē hil agërin hil nah vu yi. Lob Mehöböp vo kwa nivesa vu hil arid Paulus sën hil ahēd neving yi lo, bekevu gagek yik nebē sënë yök vu ham ving.

¹⁶ Kē! Log lok yi kapiya pin sën lo, og kevu gagek rak ngaa sënë ving. Rēk mu gagek sën neggēp lok yi kapiya agi lo la, og su degwaj neggēp rangah rē, om hil nehevong huk böp in bē natok vu degwa. Lob alam dug dug los alam sën nij wëek ma lo vahi, og deneyoh paya medeneko degwa yöohu verup rak yi gagek sënë, gerak gagek sën neggēp lok Anutu-yi-kapiya vahi lo ving. Om sënë rēk gevong bemalaj nama.

¹⁷ Sa mehö lo-e, ham rak ni muḡin bē alam nebē sënë rēk deberup, om ham ngo gwegin ham nivesa rot. In alam sën su denebē nengaj vu horek rē lo rēk detetuhin ham mededadii ham nah, lob ham su rēk bare nimin wëek rē geham rēk bēs.

¹⁸ Gaḅ ham rak hil Mehöböp Yesu Kerisi sën neko hil yom lo ni beham ko yi semusemu nyëmasën. Nebē saga, om ham pasang gwëko semusemu vu yi los gwëko kwamin vu yi noh vu buk, in ham jak

ni rot. Hil gako arë jak na vavunë rot gwëbeng sënë
gerëk gëp degwata los degwata nabë saga. Yönon!

Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Apr 2025 from source files dated 31 Aug 2023

18a972db-abcc-5dc3-9031-f1d4455b33c3